



Ils catolics en Bulgaria, ina minoritad paupra

■ Sco quei che l'Ovra d'agid catolica «Kirche in Not» communichescha allas medias vegn il pader franciscan *Jaroslav Bartkiewicz* – ord la Bulgaria – a visitar dils 29 da fevrer tochen ils 8 da mars 2020 la Svizra. En diversas pleivs grischunas vegn el ad informar sur dalla veta en Bulgaria e davart projects dalla numnada ovra d'agid che metta a disposiziun onn per onn 100 000 francs per quella tiara.

Pader Jaroslav, oriunds dalla Pologna, ei vegnius tarmess 2004 ella diaspora. El viva ed operescha el marcau da Pleven

che secatta el nord dalla Bulgaria. Cun sustegn da «Kirche in Not» han ins era saviu ereger leu in sanctuari en honor da Nossadonna da Fatima.

La Bulgaria, tiara-commembra dall'Uniu Europea, ha biebein siat miliuns habitonts. In tschunavel dad els viva en paupradad, ed in da diesch ei schizun extremamein paupers. La gronda maioritad dalla Bulgaria ei cristiana cun varga treis quartas ortodoxs.

La baselgia catolica fuorma, cun rondund 80 000 fideivels, ina pintga e paupra minoritad. S'engaschar cheu sco spiritual u mungia pretendi pazienza. Tgi che spetgi gronds success seigi el falliu liug, dian spirituals e soras. Els lavurien

per las generaziuns vegnentas. La baselgia sustegni denton era fetg la minoritad dils Roma che vegni savens discriminada e lur affons e giuvenils hagian prest neginas pusseivladads da sescolar.

Pader Jaroslav viseta, celebrescha ed informescha sur dalla situaziun dils catolics en Bulgaria en las suandontas pleivs grischunas: Samagnun/Compatsch sonda, ils 29 da fevrer e calonda mars; a Puschlav mardis e mesjamna, ils 3 e 4 da mars; a Scuol gievgia, ils 5 da mars; a Müstair venderdis e sonda, ils 6 e 7 da mars; a Riom e Rona sonda, ils 7 da mars; a Sur e Beiva dumengia, ils 8 da mars.

Lucia Wicki-Rensch, Lucerna/Trun